

BASKEPENSIONES BGAE INDIBIDUALAREN

BASKEPENSIONES 15 GIZARTE

AURREIKUSPENEKO PLAN

INDIBIDUALAREN ARAUDIA

2016 martxo

BASKEPENSIONES BGAE INDIBIDUALAREN BASKEPENSIONES 15 GIZARTE
AURREIKUSPENENKO PLAN INDIBIDUALAREN ARAUDIA

I. TITULUA

XEDAPEN OROKORRAK

1. art.- PLANAREN IZENA

Araudi honen bidez (“**Araudia**”), “BASKEPENSIONES 15” izeneko modalitate indibidualeko gizarte-aurreikuspeneko plana (“**Plana**”) integratzen da BASKEPENSIONES BGAE INDIBIDUAL erakundearen barnean (“**BGAE**” edo “**Erakundea**”).

2. art.- ARAUDIAREN XEDEA

BASKEPENSIONES BGAE INDIBIDUALA erakundeari atxikita dagoen BASKEPENSIONES 15 planaren araudiak arautu egiten ditu BGAEren eta planeko bazkide eta onuradunen arteko harremanak, baita haien eskubide eta betebeharrak ere.

3. art.- PLANAREN MODALITATEA

Plana, BASKEPENSIONES BGAE INDIBIDUALA erakundean integratua, **sistema indibiduala** modalitateko plan bat da bazkideen edo atxikitakoen arteko loturari dagokionez; aldiz, hitzartutako ekarpen eta prestazioen araubideari dagokionez, **ekarpen definituko** plan gisa definitzen da.

4. art.- HASIERA DATA ETA PLANAREN IRAUPENA

Plana Erakundean integratutzat hartzen da, Eusko Jaurlaritzako agintari eskumendunak emandako baimena jaso eta Euskadiko Borondatezko Gizarte Aurreikuspeneko Erakundearen Erregistroan inskribatua izan ondoren.

Planak zehaztu gabeko iraupena izango du.

II. TITULUA

BAZKIDEAK ETA ONURADUNAK

I. KAPITULUA

MOTAK ETA EZAUGARRIAK

5. art.- BAZKIDE ETA ONURADUN MOTAK ETA EZAUGARRIAK

Erakundearen estatutuen arabera, BASKEPENSIONES BGAE INDIBIDUALAren bazkide-motak dira:

A.- Bazkide sustatzailea

Kutxabank SA da bazkide sustatzailea, eta borondate eratzaillez eta hasierako ekarpenak eginez parte hartu du borondatezko gizarte-aurreikuspeneko erakunde baten sorreran. Gainera, Erakundearen gobernu-organoetan parte hartzen du, haren estatutuek ezarritako moduan, indarrean dagoen araudiaren arabera.

Kutxabank SAK Bilbon (Bizkaia) du egoitza, Diego López Haroko Kale Nagusiko 30-32 zenbakietan, eta inskribatuta dago Bizkaiko Merkataritza Erregistroan (5.226. liburukia, 1. folioa eta BI-58.729 orria). A-95.653.077 IFK zenbakia du (“**Bazkide sustatzailea**”).

B.- Bazkide arruntak

Bazkide arruntak edo osoak pertsona fisikoak dira, prestazioren bat lor dezaketenak, beraientzat edo beren onuradunentzat, unean-unean indarrean dagoen arautegiaren arabera (“**Bazkide arruntak**”).

Hainbat modalitate daude bazkide arrunten artean:

- Bazkide arrunt aktiboak: beraientzat edo beren onuradunentzat prestazioren bat jasotzeko eskubidea duten pertsonak, beraiek edo hirugarrenek beren izenean eginiko ekarpen ekonomikoen bitartez (“**Bazkide arrunt aktiboak**”).
- Etenaldian dauden bazkide arruntak: bazkide aktiboak izan direnak baina hiru ekitaldi ekonomikotan ekarpenik egin ez dutenak, ez beren kabuz ezta hirugarrenek beren izenean ere (“**Etenaldian dauden bazkide arruntak**”).
- Bazkide arrunt pasiboak: bazkide aktiboak izan direnak eta prestazioaren zuzeneko titularrak izatera igaro direnak, subjektu babestu gisa, gertakizuna jazo ondoren (“**Bazkide arrunt pasiboak**”).

Gainera, Erakundeak onuradunak ere izan ditzake. Onuradunak pertsona fisikoak dira, kausatzailearekin duten harremanagatik prestazioaren titular bihurtzen direnak gertakizuna jazo ondoren (“**Onuradunak**”).

Onuradunen berariazko izendapenik ezean, atxikipen-buletinean edo onuradunen izendapena egiazta lezakeen ondorengo dokumentu batean (zuzenbidean baliozkotzat hartzen dena), honako hauek izango dira onuradunak, lehentasun-hurrenkeran adieraziak:

- 1) Legez banandu gabeko ezkontidea edo behar bezala eratutako izatezko bikotekidea.
- 2) Leinuzko ondorengoak.
- 3) Aurreko ahaideak.
- 4) Legezko oinordekoak.

II. KAPITULUA

SARTZEKO, KIDE IZATEKO ETA BAJA EMATEKO ARAUBIDEA

6. art.- PLANARI ATXIKITZEA

Bazkide arrunt izateko, banakako eskaera egin eta gobernu-batzordeak (“**Gobernu-batzordea**”) zehaztutako gutxieneko zenbatekoak ordainduko dira. Araudi honetako arau guztiak onartzea dakar berarekin.

Planari atxikitzeke, banakako eskaera egingo du bazkide arruntak, eta eskaera horretan, Planari aldizka egingo dion ekarpenaren zenbatekoa jasoko da, hala badagokio, eta Gobernu Batzordeak ezar ditzakeen gainerako zehaztapenak. Planari atxikitzea egin ahal izango da KUTXABANK SA Bazkide Sustatzailearen bulegoetan, urruneko jakinarazpenetarako zeinahi prozedura erabiliz, edo Gobernu Batzordeak ezarritako beste edozein modutan.

7. art.- BAZKIDE ARRUNTEN ETA ONURADUNEN BAJA

Erakundearen estatutuetan adierazitako arrazoiez gainera, honako arrazoi hauengatik emango zaie baja Bazkide Arruntari eta Onuradunari:

- Heriotzagatik.
- Eskubide ekonomikoak osoki erabiltzeagatik, legez eta arauz ezarritako modu eta baldintzetan.

III. KAPITULUA

ESKUBIDEAK ETA BETEBEHARRAK

8. art.- BAZKIDE ARRUNTEN ETA ONURADUNEN ESKUBIDEAK ETA BETEBEHARRAK

BASKEPENSIONES BGAE INDIBIDUALAren estatuetan jasotakoak izango dira. Zehazki:

8.1 Eskubide ekonomikoen mobilizazioa

Bazkide Arruntek eta Onuradunek oso-osorik edo partzialki mobilizatu ahal izango dituzte BASKEPENSIONES 15 planean dituzten eskubide ekonomikoak BASKEPENSIONES BGAE INDIBIDUALA erakundearen beste plan batzuetara. Mobilizazioa plan bermatuetara egiten denean, ahal izanez gero, bere garaian dagokion plan bermatuentzat ezarri ziren arauak beteko dira. Hala, asmo hori jakinaraziko zaio Gobernu Batzordeari, eta honek, lege-, estatutu- edo araudi-eragozpenik ezean, beharrezko neurriak hartuko ditu eskubide hori gauzatu ahal izateko, legez horretarako ezarritako gehienezko epean, jakinarazpena jasotzen den egunetik kontatzen hasita.

BASKEPENSIONES 15 Planaren Bazkide Arruntek eta Onuradunek beren eskubide ekonomikoak mugitu nahi dituztenean, borondatezko gizarte-aurreikuspeneko beste erakunde batera, idatziz helaraziko diote eskaera Gobernu Batzordeari, eta bat etorriko da eskaera unean-unean indarrean dagoen araudiarekin. Gobernu Batzordeak, lege-, estatutu- edo araudi-eragozpenik ezean, mobilizazio-eskaera gauzatuko du, legeak ezarritako gehienezko epean, mobilizazioa egitea dagokionean.

8.2 Eskubide ekonomikoak aurretiaz erabiltzea (berreskurapen-eskubidea)

Bazkide arruntek aukera izango dute eskubide ekonomikoen zenbateko osoa edo partziala aldeztu erabiltzeko, aurreikuspen-planei eginiko ekarpenei dagozkien eskubideak, baldin eta 10 urtetik gorako antzintasuna badute, arautegiak ezarritakoaren arabera eta aintzat hartuta Eusko Jaurlaritzako dagokion agintariak, hala badagokio, zehaztuko dituen irizpideak.

Berreskurapenen ordainketa soil-soilik egin ahal izango da bazkidearen banku-kontu batean eginiko sarrera baten bidez.

8.3 Aldian behingo informazioa

Estatutuen eta aplikagarria den arautegiaren aginduz bazkide arruntei eta onuradunei eman behar zaien informazioa eta dokumentazioa gorabehera, honako hau da aipatutakoek aldian behin jaso behar duten gutxieneko informazioa:

1. Eginiko edo jasotako ekarpen eta/edo prestazioen urteko ziurtapena, baita jasandako atxikipenena ere, hala badagokio.
2. Aldi bakoitzean eginiko ekarpenen (zuzenekoak edo egotziak) sei hilekoko ziurtapena, eskubide ekonomikoen balio-aldia amaitzean (eskubiderik balego), eta aldian gauzatutako prestazioen zenbatekoa. Gainera, kudeaketa-txosten laburtu bat ere jasoko da, bazkideekin harreman telematiko bat dagoenean izan ezik, arautegi aplikagarrian ezartzen den informazioa laburbilduko duena.

Indarrean dagoen arautegiak zehazten duen informazioa baliabide telematikoen bidez jarriko da bazkide arrunten eta onuradunen esku, norberak dokumentu idatzien bidez jaso nahi duela adierazten duenean izan ezik. Gainera, nahi izanez gero, Kutxabank SAn edozein bulegotan edo BGA Eren helbide sozialean ere eskatu ahal izango da.

III. TITULUA

EKARPENEN, PRESTAZIOEN ETA GERTAKIZUNEN ARAUBIDEA

9. art.- PLANA FINANTZATZEKO SISTEMA

Ekarpen definituko finantza kapitalizazio indibiduala izango da BASKEPENSIONES 15 planaren sistema finantzario-aktuariala.

10. art.- EKARPENAK PLANARI

1. Bazkide arruntek egingo dizkiote Planari ekarpenak.
2. Ekarpunen zenbatekoa bazkide arruntek zehaztuko dute, atxikipen buletinean, eta sarrera dagokion kontu korrontean egiten den eguna izango dute sarrerako balio-data (Kutxabank SAN zabaldua, BASKEPENSIONES BGAE INDIBIDUALAREN alde).
3. Ekarpunen ordainketak egiteko, bide hauek erabiliko dira soil-soilik:
 - Zordunketa bazkidearen (edo arautegiaren arabera haren aldeko ekarpenak egin ditzaketen pertsonen) Gizarte Aurreikuspeneko Planari lotutako banku-kontuan.
 - Banku-transferentzia bazkidearen Gizarte Aurreikuspeneko Planaren kontura.
4. Bazkide arrunten ekarpenak izan daitezke:
 - a) **Aldizkakoak.** Bazkide arruntak erabakiko du aldizkakotasuna, Gobernu Batzordeak eskainitako aukeren artean. Bazkide arruntak aldizkakotasuna aldatu ahal izango du.
 - b) **Ohizkanpokoak.** Bazkide arruntak noiznahi egin ditzakeen ekarpenak, behin edo gehiagotan, aurrez ezarritako aldizkakotasun edo zenbatekorik gabe.

5. Beste BGAE baten aurreikuspen-planen eskubide ekonomikoak BASKEPENSIONES 15 planera eramateak unean-unean indarrean dagoen araudiak ezarritako kontsiderazioa izango du.
6. Planari atxikitzeko gutxienerako ekarpena Gobernu Batzordeak finkatuko du.

11. art.- ALDIAN BEHINGO EKARPENAK ALDATZEA, ETETEA ETA BERREKITEA

1. **Aldaketa.** BASKEPENSIONES 15 planeko bazkide arruntak bere ekarpen-sistema aldatu ahal izango du (zenbatekoa, aldizkakotasuna edo bariazioa), atzeraeraginik gabe, idatzi bat bidalita BASKEPENSIONES BGAE INDIBIDUALA erakundera.
2. **Etenaldia.** Idatzi bidez ere, bazkide arruntak aldi behingo bere ekarpenak eten ahal izango ditu, aldi baterako edo betiko.
3. **Berrekitea.** Bazkide arruntak aurretik eten dituen ekarpenei berrekitea erabaki ahal izango du, noiznahi, eta idatziz emango dio horren berri BASKEPENSIONES BGAE INDIBIDUALARI.

12. art.- HELBIDERATUTAKO EKARPENAK EZ ORDAINZEA

Ekarpenak banku-kontu batean helbideratuta egonik, ekarpen bat ordaintzen ez denean, BASKEPENSIONES BGAE INDIBIDUALA ez da behartuta egongo zordunketa berriro egiten saiatzera.

13. art.- EKARPENAK ITZULTZEA

Ekarpenak kobratzeko administrazio-prozesuko akatsen ondorioz, ekarpenak gaizki zorduntzen direnean bazkide arruntentz, BASKEPENSIONES BGAE INDIBIDUALA erakundeak, bazkideek hala eskatuta, gaizki kobratutakoa itzuliko du, zerga-ekitaldi berean.

14. art.- INBERTSIOEN ARAUBIDEA

Estatutuekin bat etorriz, Planari atxikitako ondarea dagozkion segurtasun-, likidezia- eta errentagarritasun-irizpideen arabera inbertituko da, era honetako Erakundeei aplikatzeko moduko araudiak xedatutako moduan eta zenbatekoan, eta zehazki, Borondatezko Gizarte Aurreikuspeneko Erakundearen jardura jakin batzuk egikaritzeko modua arautzen duen maiatzaren 29ko 92/2007 Dekretuaren 11. artikuluan xedatutako eran.

BASKEPENSIONES 15 planari atxikitako ondarea inbertitzean, kontuan hartuko da beti aurreko paragrafoan ezarritakoa, Gobernu Batzordeak erabakiko dituen eta Inbertsio Printzipio Adierazpenaren bidez bazkideei jakinaraziko zaizkien mugen barnean. Nolanahi ere, bazkideek eskubidea izango dute beren eskubide ekonomikoak BASKEPENSIONES BGAE INDIBIDUALA erakundearen plan batetik bestera transferitzeko, horretarako ezarritako baldintzen arabera. Plan bermatuen kasuan, haien ezaugarriak errespetatuko dira.

15. art.- PLANAREN PRESTAZIOAK

Planaren prestazioak (Araudi honen hurrengo artikuluan jasoak) Bazkide Arruntak edo Onuradunak prestazioen ordainketa-datan dituen eskubide ekonomikoen balioari dagozkio.

Ezingo dira eskubide ekonomikoak bahitu, harik eta dagokion prestazioa kobratzeko eskubidea emango duen gertakizuna jazo arte; eta ezingo da eskubide horietan kenkaririk, atxikipenik, lagapenik edo konpentsaziorik gauzatu, ezta ezein kontraturen berme gisa erabili ere.

Gertakizuna jazotakoan, bahitura, oztopo judiziala edo administratiboa baldin badago, epaitegiak edo administrazio eskudunak erabakitakoa bete beharko da.

Heriotza kasuan, bahitura, oztopo judiziala edo administratiboa baldin badago, epaitegiak edo administrazio eskudunak erabakitakoa bete beharko da, onuradunei legezkiekeen hondarreko eskubide ekonomikoak jakinarazi aurretik.

16. art.- PLANAK ESTALTZEN DITUEN GERTAKIZUNAK

Honako hauek dira Planak estaltzen dituen gertakizunak (prestazioak ordaindu beharra eragiten dutenak):

a) Erretiroa: erretiro-gertakizuna halakotzat joko da bazkide arruntak Gizarte Segurantzaren eta antzekoen araubidean oinarrituta erretiroa hartzen duenean. Erretirotzat hartuko dira, halaber, erretiro aurreratua, malgua, partziala eta Gizarte Segurantzak onartzen dituen beste hainbat egoera baliokide.

Erretiro-egoerara iristerik ez dagoenean, 60 urte betetzean eskatu ahal izango du prestazioa bazkide arruntak, baldin eta lan-jarduerarik edo jarduera profesionalik egiten ez badu, edo egiteari uzten badio, eta Gizarte Segurantzaren ezein araubidetan erretirorako kotizatzen ez badabil.

Erretiro partziala hartzen duten bazkideek erretiro osorako ekarpenak egin ahal izango dituzte, dagokion prestazioa jasotzen badaude ere.

b) Ezintasun iraunkorra edo lanerako baliaezintasuna, Gizarte Segurantzaren edo antzekoen edozein araubidetan ezarritakoaren arabera.

Ezintasun iraunkorra edo lanerako baliaezintasuna izan daiteke: ezintasun iraunkor partziala ohiko lanbiderako; osoa, ohiko lanbiderako; absolutua, era guztietako lanetarako; eta baliaezintasun handia. Egoera horiek zehazteko, Gizarte Segurantzaren dagokion araubidea erabiliko da.

Bazkide arruntak ezin badu Gizarte Segurantzaren sistema publikoko lanerako ezintasunari dagokion inolako prestaziorik jaso, lanerako ezintasun-gertakizuntzat joko da, baldin eta ordaindutakoaren arabera ez diren pentsioei aplikagarria zaien araudiarekin bat etorrira, eskumena duten organo ofizialek edo Erakundeak balorazio-funtzio hori espezifikoki egozten dion

organoak erabakitzen badute aipatutako araudian jasotako baremoen arabera % 33tik gorako ezgaitasun-maila edo gaixotasun kronikoa duela.

c) Heriotza. Bazkide arruntaren heriotzak alarguntasun- edo zuztasun-prestazioetarako eskubidea sor dezake, baita beste onuradun batzuen aldeko prestazioak ere. Onuradunak, dokumentu fedemaileen bidez hala dela egiaztatzen duenean, aukera hauek izango ditu:

- Erakundearen bazkide gisa sartzea, dagozkion eskubideekin.
- Eskubide horiek berak adierazitako entitatara mugitzea.
- Eskubideak eskuratzea, osorik edo partzialki, bazkide arruntaren heriotzagatiko prestazio gisa.

d) Mendekotasuna: adinagatik, gaixotasunagatik edo ezgaitasunagatik, autonomia fisikoa, mentala, intelektuala edo sensoriala galtzen dutenez, beste pertsonen etenik gabeko laguntza behar duten pertsonen egoera da; edo laguntza handiak behar dituzte, eguneroko oinarrizko zereginetarako, edota, ezgaitasun intelektuala edo gaixotasun mentala duten pertsonen kasuan, beste laguntza batzuk behar dituzte beren autonomia pertsonalerako. Gertakizun hau bat etorriko da mendekotasun larriarekin edo mendekotasun handiarekin, mendekotasunari buruz indarrean dagoen araudian ezarritakoarekin bat etorriz.

e) Iraupen luzeko langabezia: lana galdu edo jarduera eten duten (langile autonomoen kasuan) pertsonak; betiere, baldintza hauek betetzen badituzte:

- (i) Legez langabezia-egoeran egotea. Ondorio horietarako, lan-harremanaren edo harreman administratiboaren amaitze-kasuak hartuko dira aintzat, bai eta lan-kontratuaren etenak ere. Guztiak Gizarte Segurantzaren legedian aurreikusi bezalaxe.
- (ii) Ordaindutakoaren arabeko langabeziagatiko prestazioetarako eskubiderik ez izatea, edo hala badagokio, urtebetean kobratu izana, prestazioa aurretik amaitu den kasuetan izan ezik. Urtearen zenbaketa egiaztatu ahal izango da nahiz eta langabeziako 12 hilabeteak ez izan jarraian.
- (iii) Eskaera egitean enplegu publikoaren dagokion zerbitzuan enplegu-eskatzaile gisa izena emanda edukitzea.
- (iv) Aurretiaz Gizarte Segurantzaren araubidean integratuta egon diren eta orain jarduera etenda duten norberaren konturako langileen kasuan ere prestazioa jaso ahalko da, arestian aipatutako (ii) eta (iii) ataletan xedatutako baldintzak betetzen badira.
- (v) Prestazioa hilabeteko errenta moduan ordainduko da, non eta Bazkide Arruntak ez duen ordainketa bakarrean egiteko eskatzen, enplegua sustatzeko helburu zehatz batzuekin. Hilabeteko errenta baliokidea zehazteko, honako irizpide hauek aplikatuko dira:
 - Ordaindutakoaren arabeko langabeziagatiko prestazio publikoa jasoz gero, errenta baliokide maximoa ordaindutakoaren arabera jasotako prestazioaren parekoa izango da, hasierako zenbateko gordin berekoa.

- Ordaindutakoaren araberako prestazioan jasotako zenbatekoa murriztuz gero, murrizketa hori orekatu ahal izango da egindako murrizketaren gehieneko zenbateko bereko prestazio osagarri bat emanez.
- Ordaindutakoaren araberako prestaziorako eskubiderik izan ezean, sistema publikoan ordaindutako kotizazioak aintzat hartuta kalkulatu da gehieneko prestazio baliokidea, bai eta ordaindutakoaren araberako prestazioa jasotzeko eskubidea izateko baldintzak betetzen direla aintzat hartuta ere.

f) Gaixotasun larria: Bazkide Arruntari bere ohiko jarduera edo zeregina gauzatzea gutxienez hiru hilabeteko denboraldi jarraituan galarazten dion zeinahi gaitz fisiko zein mental edo lesio, edo bazkidearen, ezkontidearen, izatezko bikotearen, lehen mailako aurreko ahaideen zein ondorengoen edo babesean zein harreran Bazkide Arruntarekin bizi den edo haren menpekoa den pertsonaren kirurgia handiko esku-hartze kliniko edo ospitaleko tratamendua eskatzen duen gaitza.

Aurreko kasuak gaixotasun larritzat joko dira, baldin eta Bazkide Arruntak ez badu horregatik baliaezintasun iraunkorragatiko ezein mailako prestaziorik jasotzen, Gizarte Segurantzaren araubidearen arabera, eta betiere, bazkideak erabilgarri duen errentaren gutxitzea badakar, gastuak handitu direlako edo diru-sarrerak murriztu direlako, modu egokian egiaztatuta. Ondorio horietarako, gastuen aurrekontuak aurkeztu ahal izango dira.

Prestazio-eskaerak BASKEPENSIONES BGAE INDIVIDUALARI egingo zaizkio idatziz, dagokion egoera ziurtatzen duten egiaztagiriekin batera.

17. art.- PRESTAZIOAK ORDAINTZEKO MODALITATEA

Bazkide arruntei eta onuradunei prestazioa jasotzeko duten eskubidea aitortzen zaienean (jada aipatu diren arrazoiengatik), hainbat modu izango dituzte hura eskuratzeko:

- Kapitala: kapitalaren zenbatekoa, gehienez, bazkideen eskubide ekonomikoen balioa izango da, eta kapital partzial modura eskatu ahal izango du prestazioa bazkide arruntak edo pertsona onuradunak.

- Errenta: errentaren zenbatekoa eskubide ekonomikoek prestazioaren sortzapenaren unean duten balioaren arabera izango da, Gobernu Batzordeak une horretan finkatuta dituen errenta-moten eta ezaugarrien barnean. Prestazioak errenta-moduan kobratzen hasten direnean, haien kobrantza partzialki edo osoki aurreratzen bada, zenbateko hori kapitalizat hartuko da.

- Kapital-Errenta: aurreko bi modalitateen konbinazioa da.

Gaixotasun larriagatiko prestazioa kapital moduan egingo da, eta ez da izango gaixotasunak eragindako sarrera-gutxitzeak edo gastu-handitzeak eragindako zenbatekoa baino handiagoa, ezta bazkide arruntaren eskubide ekonomikoen balioa baino handiagoa ere.

Iraupen luzeko langabeziagatiko prestazioa hileko errenta gisa emango da, honako Araudi honetan aurreikusitako baldintzetan, non eta Bazkide Arruntak ez duen eskatzen ordainketa bakarrean egiteko, enplegua sustatzeko helburu zehatz batzuekin.

Prestazioen ordainketa, kapitalean edo errentan, soil-soilik egingo da dagokion sarrera eginez bazkidearen edo onuradunen banku-kontuan.

18. art.- PRESTAZIOAK ORDAINTZEKO PROZEDURA ETA AITORPENA

1. Prestazioa eragiten duen gertakizuna jazotzen denean, prestazioa jaso nahi duen Bazkide Arruntak edo/eta Onuradunak hori jakinaraziko dio BASKEPENSIONES BGAE INDIBIDUALAri, eta behar den informazioa eta prestaziorako eskubidea duela egiaztatzen duen dokumentazioa erantsiko du.

2. BASKEPENSIONES BGAE INDIBIDUALA erakundeak dokumentazio hori aztertuko du, eta beharrezkoa irizten dion datu guztiak eskatu ahal izango ditu.

3. Eskaera eta sinestamendu guztiak Entitatean aurkeztu eta bost egun balioduneko gehieneko epean ordainduko ditu BGAEk prestazioak. Gertakizuna Bazkide Arrunt baten heriotza bada, ordea, epe hori onuraduna nor izango den zehazten denean irekiko da.

4. Bazkideek edo Onuradunek egin nahi duten erreklamazio orotarako, BASKEPENSIONES BGAE INDIBIDUALA erakundeko Gobernu Batzordearengana edo bazkidearen defendatzailearengana joko dute, erakundearen estatutuetan jasota dagoen moduan. Hurrengo bilerako aztergaien zerrendan sartuko da erreklamazioa. Hartutako erabakia erreklamatzailerari jakinaraziko zaio.

19. art.- PRESTAZIOAK ESKURATU IZANAREN ZIURTAGIRIAK

Urte natural bakoitza amaitzean, BASKEPENSIONES BGAE INDIBIDUALAk ziurtagiri bat bidaliko die bazkide arrunt pasiboei eta onuradunei, urtean jasotako prestazioen zenbatekoarekin eta Pertsona Fisikoen Errentaren gaineko Zergaren kontura eginiko atxikipenekin.

IV. TITULUA

ADMINISTRAZIO GASTUAK

20. art.- ADMINISTRAZIO GASTUAK

Planaren administrazio-gastuak araudi aplikagarrian ezarritakoren arabekoak izango dira. % 1,60koak izango dira, eta hari atxikitako ondarearen arabera kalkulatuko dira.

Ondorio horietarako, administrazio-gastutzat hartuko dira Planari atxikitako ondarearen administrazio-lanetan sortzen diren zuzeneko zein zeharkako gastu guztiak; balioen salerosketatik eratorritako bitartekaritza-gastuak, ordea, ez.

V. TITULUA

ARAUDIA ALDATZEA

21. art.- ARAUDIA ALDATZEA

Araudi hau aldatu ahal izango da Entitatearen Gobernu Batzordeak proposatzen eta onartzen badu, eta ondoren, Eusko Jaurlaritzari aurkezten bazaio eta hark onartzen eta erregistratzen badu.

VI. TITULUA

GATAZKAK ETA ERREKLAMAZIOAK EBAZTEA

22. art.- GATAZKAK ETA ERREKLAMAZIOAK

Bazkide Arruntak, Onuradunak edo pertsona eskubidedunek legez onartutako beren interes eta eskubideekin zerikusia duten kexak eta erreklamazioak aurkeztu ahal izango dituzte, idatziz, Gobernu Batzordean edo bazkidearen defendatzailearen aurrean, norberak aukeratuta.

Gobernu Batzordeak, hala badagokio, Erakundearen zuzendaritzaren esku utz dezake ebatzeko lana, edo hala badagokio, bertan zerbitzu profesionalak eskaintzen dituzten pertsona fisiko zein juridikoen esku.

Bazkidearen defendatzaileak gehienez ere 15 eguneko epean ebatziko ditu aurkezten dizkioten erreklamazio guztiak, berezkoa duen prozedura-araudiaren arabera. Eta defendatzailearen aldeko erabakiak lotesleak izango dira Erakundearentzat.

Bazkidearen edo gobernu-batzordearen defendatzailearen erabakia ez da oztopo izango erabateko tutoretza judizialerako eta ez administrazio-kontrolerako eta -berrikuspeneko funtzioen erabilerarako.

Nolanahi ere den, kexa edo erreklamazioa Batzar Nagusian edo Gobernu Batzordean erabaki bat hartzeko arrazoi bada, Erakundearen estatutuetan xedatutakoa aplikatuko da.

VII. TITULUA

PLANA IRAUNGITZEKO ARRAZOIAK ETA ONDAREAREN ERABILERA

23. art.- PLANA IRAUNGITZEA

Honako arrazoi hauengatik iraungiko da Plana:

- a) Bazkide Arruntik eta Onuradunik ez dagoelako.
- b) Gobernu Batzordearekin erabakiz. Horretarako, ezinbestekoa izango da aldez aurretik eragindako prestazioen banakako bermea izatea eta Bazkide Arrunten eta Onuradunen eskubide ekonomikoak Erakundearen beste aurreikuspen-plan batean edo Borondatezko Gizarte Aurreikuspeneko beste Entitate batean integratzea. Gobernu Batzordearen erabakiak Baskepensiones BGAEren aurreikuspen-planaren erabilera zehatza erabaki beharko du, eta horren berri eman Bazkide Arruntei eta Onuradunei, aldez aurretik, gutxienez bi hilabete lehenago. Era horretan, beharrezkoa izanez gero, aurrekoa ez den beste aurreikuspen-plan batera mugitu ahal izango dituzte beren eskubide ekonomikoak.

XEDAPEN GEHIGARRIA

Arautegi hau BASKEPENSIONES BGAE INDIBIDUALA erakundearen estatutuei erantsi zaie, haien parte izan dadin.